

◎ 如來十力

《三藏法數》——出《圓覺略鈔并大智度論》

如來證得實相之智，了達一切，無能壞、無能勝，故名力也。

一、知是處非處智力。謂如來於一切因緣果報，審實能知。如作善業，即知定得樂報，名知是處；若作惡業，得受樂報，無有是處，名知非處。如是種種，皆悉遍知，故名知是處非處智力。

二、知過現未來業報智力。謂如來於一切眾生，過去未來現在三世業緣、果報、生處，皆悉遍知，故名知過現未來業報智力。

三、知諸禪解脫三昧智力。梵語三昧，華言正定。謂如來於諸禪定，自在無礙，其淺深次第，如實遍知，故名知諸禪解脫三昧智力。

四、知諸根勝劣智力。謂如來於諸眾生，根性勝劣，得果大小，皆實遍知，故名知諸根勝劣智力。

五、知種種解智力。謂如來於諸眾生，種種欲樂，善惡不同，如實遍知，故名知種種解智力。

六、知種種界智力。謂如來於世間眾生，種種界分不同，如實遍知，故名知種種界智力。

七、知一切至處道智力。謂如來於六道有漏行所至處，涅槃無漏行所至處，如實遍知，故名知一切至處道智力。

* 有漏行者，謂六道眾生，由身口意所作業行，而漏落生死也。
* 無漏行者，謂一乘修戒定慧道品之行，而不漏落生死也。

八、知天眼無礙智力。謂如來證知天眼清淨，見諸眾生生死時生時，端正醜陋，善惡業緣，皆悉無礙，故名知天眼無礙智力。

九、知宿命無漏智力。謂如來於種種宿命，一世乃至百千萬世，一劫乃至百千萬劫，死此生彼，死彼生此，姓名、飲食、苦樂、壽命，如實遍知，故名知宿命無漏智力。

十、知永斷習氣智力。謂如來於一切惑餘習氣分，永斷不生，如實遍知，故名知永斷習氣智力。